

**REGIONAL NEWS BULLETIN  
HEADLINES (MORNING)**

**Date – 16/04/2025**

**Time - 7:30 Hrs**

1. Serchhip College Zirlai pawl Students Union te chuan an thilngiat nawr nan tukin dar 8:30 atangin tiamchin awm lovin college chhunga Khawtetlang panna Kawng an dang dawn.
2. An ram laka zangnadawmna phuta kawngpui siam dangtu Bairabi Land Owners Association ten sorkar hmalakna ngaichangin kawngpui siam dan tih tawp an remti.
3. Union Minister for Road, Transport and Highways Nitin Gadkari chuan nitin highway km 100 zel siam thei khawpa chakin hna thawh tum anih thu a sawi.
4. Congo-a ruahsur nasa leh tuilian avangin mi 72 an thi tawh a, mi 170 chuangin hliam an tuar.

<><><>

**STUDENT PROTEST**

Serchhip College Zirlai pawl Students Union te chuan tukin dar 8:30 atangin tiamchin awm lovin college chhunga vantlang kawng, DC leh a hnuai Officer zawng zawng te chenna Khawtetlang panna Kawng dan an tum tih an sawi a.

SU Vice President Benjamin Lalhmangaihkhima chuan Serchhip Press Club ah Serchhip a thuthar thehdarhtute kawmin an college a Lecturer mamawh te, Chief Minister leh Higher & Tech Education Minister hnena vawi engemaw zat Sorkar a an lo thlen tawh chu tun thlenga tih hlawhtlin a la nih loh avangin lungawilohna an lantir dawn an ti a, lecturer an mamawhna hi nikum lam atangin thuneitu sangah an thlen tawh a, kumin february thla khan Chief Minister in Serchhip district Hospital a Ultrasound thar a hawn naa a thu sawi ah College ah hian Zirtirtu Geography department-ah a nghet pahnih, Zoology department-ah a nghet pakhat leh nghet lo pakhat, leh BCA department-ah a nghet lo pakhat dah belh a tiam chu vawiin thlenga, Higher & Tech Education Deptt in a la tihhlawhtlin loh thu leh, kum 6 chhungin zirtirtu nghet 13 zet sawn chhuah an nih thu te, an aiah nghet lo dah thin an nih thu te a sawi a. An dinhmun ngaihtuah in NAAC assesment an hmachhawn tur ah Grade-A an hau phak tawh loh phah an hlauhthawn thu te a sawi a ni.

SU hruaitute sawi danin, tun dinhmun ah GSC ah hian zirtirtu nghet lo 31 lai an lain, a nghet chu 21 chauh an ni a, Focus district a la puan ve loh District zingah Serchhip District chhunga Serchhip College chauh hi Multidisciplinary College (Arts, Science leh BCA awm vek na college) awmchhun n ni a, infrastructure a pachhe ber an ni.

Hetihlai hianGovt. Zirtiri Residential Science College zirlaite chu an zirtirtu Pi Lalthanpuii Hnamte sawn tur duhloin an college luhkaah an nimin khan an pungkhawm a.

College zirlai hruaituten Akashvani an hrilh danin an zirtirtu Botany department- a Asst. Professor Pi Lalthanpuii Hnamte chu Serchhip college a thawk mek Dr. Lalhmangaihzuai nen sorkarin thlak thleng a tum a. Pi Lalthanpuii Hnamte chu an college tana tangkai tak ni mek, zirtir hna mai bakah college thil pawimawh hrang hrang tangkai leh nihna pawh chelh hnem tak, club hrang hrang hruaitu ni mek a nih avangin sawn chhuah an duh lo a ni.

<><><>

**CSS PENDOWN STRIKE**

Chief Secretary charge la mek tu Pu H. Lalengmawia'n Centrally Sponsored Scheme hnuai thawk te chu dik leh mumal taka lak an awm loh avangin dah ngheh theih an nilo a ti.

Nimin khan thuthar thehdarhtute kawmin Pu Lalengmawia chuan CSS hnathawkte chu DPC kaltlanga lak an nih loh bakah induhsakna avanga hna inpek a tam hle a ti a, lak dan mumal lo taka lak an nih avangin seniority list pawh an nei hleithei lo tih sawiin NHM leh SSA thawktu zingah an tam zual a ti a, CSS Regularisation Scheme kalpui tura thil tul leh pawimawh tak chu inter seniority niin hei hi tihfel a harsat dawn

avang leh mumal lo taka thil a kal tam tawh avangin CSS Regularisation Scheme chu kalpui theih a nilo a ti a, India danpui hnuaiia Article 14 leh Article 16 an bawhchhe thiango tih sawiin dan anga lak loh ten an hmang ve theilo tih a sawi.

Pu H. Lalengmawia chuan CSS hnuaiia dan loa lak te dah ngheh an nih chuan an tlukpui ten court ah sawrkar a khin chuan sawrkarin thiam a chang dawnlo a ti a, mitin angkhat veka en a ngai tih sawiin AMECC thilphut ti hlawhtling tur chuan Mizoram sawrkarin India dan a bawhchhiat a ngai dawn a ti a, lungawilohna an lantir chungin sawrkarin hlawh a cut sak dawn tih sawiin an kal thui zel chuan an service tawp palh thei ani tih a sawi bawk.

Hetihlai hian, All Mizoram CSS Employees Coordination Committee (AMCECC) chuan nimin atang khan ni 3 chhung sorkara an thil phut nawr nan pen-down strike an huaihawt a, AMCECC chuan thuchhuah siamin an thil phut ngiata nawrh an huaihawt mekin awmzia a neih loh chuan tun thla ni 21 atanga ni 23 chhung hian AMCECC chuan Mass Casual Leave lain nawrh chhunzawm an tum thu an sawi a ni.

AMCECC chuan Chief Secretary Charge la mektuin Press Conference-ah CSS hnuaiia dan loa lakte chu dahngheh theih an nih loh thu a sawi leh, AMCECC thil phut an tih hlawhtlin chuan India Constitution bawhchhiat a ngaih dawn thu a sawi chu hriatthiam har an tih thu an sawi a. CSS te dinhmun hrechiangtu Mizoram sorkar chuan CSS te dahngheh theihna tur dan ‘Govt, of Mizoram Regularization of CSS Employees Scheme, 2024’chu duhsak taka siamsakin, he dan hi a taka an hman ngei theih nana Chief Minister pawhin a theihna dan zawng hram hram tura thuneitute a chah mawlh mawlh lain, dahngheh an nih theihna tura hma la lova, a harsatna leh a theihlohna dan zawn sak zel tu an la awm fo chu AMCECC chuan an duhloh takzet thu an sawi a ni.

AMCECC General Secretary Pu Vanlalpeka chuan CSS Regularisation Scheme nikuma passed tak chu a taka hman ngei an duh tih sawiin Mizoram puma CSS-a thawk mi sing 1 chuang te chu sawrkar kut ke ber an nih avangin a ngheta dah awm tak vek an ni a ti a, tun dinhmunah MR an bill theihloh bakah pay scale mumal neilo in pension pawh awmlo in an thawk a, CSS Regularisation Scheme chu DP&AR thuchhuahin a hnawl avangin hreh tak chungin lungawilohna an kalpui a ngai a ti a, Mizoram sawrkar chuan lungawi lohna lantir an tumah hnathawk lote chu CCS (Conduct) Rules, 1964 hmanga an hlawh cut a ni dawn tih chu sawi mahse nawrh an kaltlang pui tih a sawi bawk.

<><><>

#### LAND OWNERS PROTEST

NH 154-Bairabi leh a chhehvel kawngpui thawmthat hna kal mek a compensation lak chungchanga lungawilohna Bairabi Land Owners Association ten an lantir chungchangah Kolasib Bawrhsap Pu Robert C Lalhmangaiha hovin Land Owners Association te nimin khan an thukhawm a, Bawrhsap hian an nawrhna te titawp turin ram neitu kalkhawmte a ngen.

Bawrhsap chuan ram neitute manganna chu an hriatpui a, chuvang chuan theihtawp in a tul ang ang in hma lak mek a ni, a ti a. He an lungawilohna bultanna kum 2006 compensation dawng ve lo ten an dawn theih nan hian hmalakna thui tak kalpui tawh a ni a ti a. Spot verification pawh nikumah tih tawh a nih thu sawiin Bawrhsap chuan chuta an assessment report te chu PWD Highway lamah thawn a nih tawh thu leh chumi hnuah state sawrkar atanga thudawn bawhzuiin re-assessment neih leh a nih hnuah Revenue Department ah thawn a ni leh tawh a ti a. State sawrkarin a pawmna PWD highway lamah thawnin PWD lam pawhin an estimate te Regional Officer, MoRTH, Guwahati ah thawnin an thu ngaihchan mek a ni, a ti.

Bawrhsap chuan hetiang hi thil kal dan a nih avangin Contractor te hnathawk loa an siam chuan awmzia a nei dawn lo tih a sawi a. Chuvang chuan dawhthei taka RO Guwahati lam thutlukna te ngaichang a contractor ten hna an chhunzawm theih nana an nawrhna te titawp turin a ngen a ni.

An thutkhawmnaah hian ram neitute pawh in an harsatna te thlen in, an lungawilohna lantir chhan pawh sawrkarin a hriatthiampui an beisei thu an sawi a. A hma thei ang bera an compensation dawn tur te an lak theih nan theihtawp a hma lak pui turin Bawrhsap leh PWD hotute chu an ngen a ni. Bairabi Land Owners Association

chuan DC ngenna angin kawngpui siam lai dan tawh loh ni se an ti a, tun thla chhhunga an chungchanga hmalakna ngaihchan ni se an ti a ni.

<><><>

## **VC ASSN ELECTS**

All Mizoram Village Council Association 2025-2030 hruaitu thlanna nimina Aizawl Vanapa Hall-a neihah Elected OB post awm zawng zawngah ZPM Party atanga Village Council member-te thlantlin an ni a,

Hruaitu thlanthar te hi, President : Pu FP Laikhama VCP, Sihphir Venghlun, Sr. Vice President : Pu H.Lalfakzuala VCP, Kawnpui VC-III leh Treasurer : Pu C.Lalromawia, VCP Tualpui khua te an ni.

AMVCA hruaitu term hi kum 5 a ni a, Village Council hruaitu thlan thar te hi an lawmpui thu ZPM party thuchhuah chuan a sawi a, VC Memberte chu ram hmasawna hnathawh kawngah Sorkar kut ke pawimawh tak an nih avangin Association hruaitu tha neih a tul hle a, kawng hrang hranga Sorkar hmalakna thawhpui thei tur Association hruaitu an nei ta chu ZPM Party chuan thlamuan thlak an ti a, khaw tin leh veng tinah hmasawna thar duhawm tak tak hmuh ngei an beisei tih an tarlang a ni.

Vawiin AMVCA hruaitu thlan hi President tanglai Pu K.Lalngaizuala(VCM), East Lungdar in a kaihruaia, VC member mi 220 kalkhawmin, Returning Officer(RO) Pu R.Lalhmingmawia General Secretary AMVCA kaihruaina hnuaiah inthlanna hi tuang taka neih a ni a, Hruaitu hlui leh hruaitutu tharte hian Charge an inhlam nghal bawka a ni.

<><><>

## **PWD MINISTER**

PWD Minister Pu Vanlalhlalan kawng chu mi zawng zawng intawm a nih angin a enkawl leh dimdawi kawngah mipuiten mawhphurhna an nei a ti.

Nimina Aizawl khawpui chung kawng thawmthat zelna tur a ruahmanna leh hmachhawpte sawihona hun Coordination Meeting MINECO –a a hoa buatsaihah he thu hi PWD Minister chuan a sawi a. Minister chuan kawng tha leh tlo nei tur chuan a nihna tur ang taka kawng siam a pawimawh bakah kawngpui behchhana hna kalpui ngai thin department-te nen thawhho a pawimawh thu a sawi a ni.

Thutkhawmah hian PHE Department, P&E Department, Aizawl DC, Superintendent of Police (Traffic), UD&PA Department, Transport Department, Aizawl Municipal Corporation, SIPMIU, Aizawl Smart City Limited bakah Central YMA leh Aizawl City Local Council Association aiawh te an tel a. Kawng tha leh tlo nei tur a thil pawimawh hrang hrang leh harsatna awm thei sutkian dan turte sawi ho a ni.

Aizawl khawpui chung kawng thawmthat hna hi thuang hnih a kalpui tur a ni a. Aizawl Road North Division hnuaiah km 44-a thui leh Aizawl Road South Division hnuaiah km 40-a thui thawmthat tura tih a ni a. Aizawl khawpui chung kawngpui tam zawk hi Bituminous Concrete hman a thawmthat tum niin Thuampui leh Selesih kawng bikah hi chuan Rigid pavement-a siam that tum a nih thu thutkhawmah hian tarlan a ni.

M/s Nidhi Creative Infrastructure Ltd.-ten EPC Mode in thla 18 chhung an thawk ang a. Bituminous Concrete atan a hman tur bungrua hi Cachar leh Rawpuichhip atanga lak tum a ni a. Zanin atang hian a thawh khatna atan Bawngkawn atanga Chanmari inkar kawng thawmthat hna thawh tan tum a ni.

<><><>

## **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Vawiin chawhnu dar 2 leh a chanve-ah Chanchinthar puan leh a ni ang.

<><><>

## **NITIN GADKARI**

Union Minister for Road, Transport and Highways Nitin Gadkari chuan nitin highway km 100 zel siam thei khawpa chakin hna thawh tum anih thu a sawi. Nimina All India Management Association National Leadership Conclave Delhi-a neih a hmanpuinaah he thu hi sawiin Pu Gadkari-a chuan ramchhunga hmasawna ruhrel tih hmasawn chu a pawimawh hle a ti a. Thla 18 lo awm tur chhung hian ramchhunga inkalpawhna kawngpui awm zat hian US a khum tawh dawn tih a sawi bawk a ni.

<><><>

## **CONGO**

Congo-a ruahsur nasa leh tuilian avangin mi 72 an thi tawh a, mi 170 chuangin hliam an tuar. Tuilian hian Congo ramchhunga province hrang hrang a nghawng a, Kinshasa khawpui chu a tuar nasa ber an ni a. Mi 5000 chuang an awmhmun sawn sak an ni a. Ramchhung chhak lam Tanganyika leh South Kivu province pawhin tuilian hi an tuar nasa nia thudawn a ni a. Chhawmdawlina hmun siam lailawk niin hetah hian mi tam tak an khawsa mek a. Ruah hi a sur chho zel anih chuan mi maktaduai 17 chuangin harsatna an tawh rin anih thu dawn a ni bawk.

<><><>